

19 JUL 1997

Penerbangan (Bergambar)

LANGKAWI AKAN MUNCUL SEBAGAI PUSAT KEGIATAN PENERBANGAN

LANGKAWI, 19 Julai (Bernama) -- Langkawi akan dijadikan pusat penerbangan dan pemasangan pesawat di masa depan sejajar dengan hasrat Perdana Menteri Datuk Seri Dr Mahathir Mohamad untuk menjadikannya pusat industri penerbangan utama di negara ini.

Pengurus Besar Lembaga Pembangunan Langkawi (LADA) Datuk Abdul Halil Mutalib hari ini berkata untuk tujuan itu LADA telah menyediakan kawasan seluas 80 hektar berdekatan lapangan terbang antarabangsa Langkawi di Padang Matsirat.

"Kita telah menyediakan tempat bagi tujuan itu dan mempelawa pelabur yang berminat untuk memulakan operasi terutama dalam pengeluaran komponen tertentu pesawat sehingga kepada pemasangan pesawat," katanya kepada pemberita selepas melancarkan penubuhan Kadet Udara Kelab Rekreasi Udara Langkawi (KRUL) di sini hari ini.

Abdul Halil, yang juga Presiden KRUL, berkata penubuhan industri itu bersesuaian dengan usaha kelab "membuka pintu" kepada pelajar sekolah untuk mempelajari selok belok penerbangan termasuk daripada segi penyenggaraan pesawat.

Katanya beliau yakin melalui usaha itu ia akan dapat melahirkan tenaga mahir yang diperlukan dalam pengendalian penerbangan apabila industri itu beroperasi kelak.

Katanya buat permulaan seramai 30 pelajar dari Sekolah Menengah Kedawang dipilih sebagai kadet udara dan keanggotaannya akan diperluaskan ke tiga buah sekolah menengah yang lain di pulau peranginan itu.

Beliau berkata selain dilatih menyenggara pesawat, pelajar tingkatan tiga hingga lima itu akan diberi peluang menjadi pelatih juruterbang.

KRUL dilancarkan oleh Dr Mahathir yang juga penaung kelab itu pada Jun 1995 dan kini ia dianggotai kira-kira 100 orang.

Sempena pelancaran itu, empat pesawat ringan milik kelab termasuk sebuah pesawat jenis Eagle X-TS buatan Malaysia mengadakan demonstrasi penerbangan.

Komponen pesawat itu dikeluarkan di Bandaraya Teknologi Komposit (CTC) Batu Berendam, Melaka dan pemasangannya dilakukan di Australia. -- BERNAMA

NH AKD